



Radwor

ma kombinat za dejny skót



Beno Cyž, kiž sam z Radworskeje gmejny pochádza, přetřiha běly bant a wotwrě z tym nowy kombinat za dejny skót.

Hans Klose, nawoda Mjezdrustwoweje twarskeje organizacije Mały Wjelkow, přepoda předsydomaj prodrustwow Radwor a Zarěč, H. Gäbleraj (na delnim wobrazu srjedža) a J. Karpje, symboliski kluč.

Rudolf Schmidt, nawoda noweho kombinata, a Hanža Klimanowa, dejerka při modernym dejnym štandže, wjedzetaj jalojcu z čisłom 4 086 do hródže (naprawo deleka).

(Fota: Rabovsky)

Wjesole mjezwoča njehladajo na zymu a deščik na nazymskim pjatku w Radworju. Prodrustwowniče a prodrustwownicy z Radworja a Zarěča maja wšu přičinu so radować. Jim přepoda so na tutym dnju moderny kooperaciski kombinat za dejny skót. Přepodaće kluča potajkim jenož po 13,5 měsacach twarskeho časa. Twarscy dželačerjo Mjezdrustwoweje twarskeje organizacije Mały Wjelkow dokonjachu to w jara krótkim času, w krótsim času, kaž bě to spočatnje planowane. Woni stajichu z tym wulkotne měritka, kotraž su přiklad druhim twarskim organizacijam.

Na tutón wulki podawk prodrustwownikow z Radworja a Zarěča – z přepodaćom kombinata so jich doholětne přeće spjelni – přeprósychu sej mnohe wuznamne wosobiny towaršnostneho žiwjenje, kiž podpěrowachu jich kóždy čas při zmištrowanju wšech problemow.

Na spočatku wustupichu šulerjo z Radworja z małym, so lubjacym programom. „Pójće z nami wšitcy młodži...“, mjez druhim spěwachu. To je tež žro za wuspěšnu produkciju w tajkim modernym kombinacie, mjenujcy dobyće młodostnych. Na to hladachu wšitcy zamołwići ze wšeho spočatka, a z dobom přepoda so kombinat jako młodžinski objekt.

Po programje šulerjow porěča člon Zwjazkowneho předsydstwa Domowiny Beno Cyž, člon sekretariata Wobwodneho nawodnistwa SED a předsyda RLN Drježdžany, a wuprají džak a připóznaje přítomnym

prodrustwownikam a twarskim dželačerjam. „Džensa přepoda so 10 kombinat za dejny skót w Drježdžanskim wobwodže, kotryž budže po industrijowych metodach mloko produkować. Twarske brigady z Małego Wjelkowa stajichu měritka, wo kotrychž budže so hišće dołho po cyłym wobwodže rěčeć. Waš kombinat ma za towaršnostne dalewuwiće wulki wuznam.“

Wjace hač 100 burskich swójbow, kiž džensa hišće pod čežkimi a komplikowanymi wuměnjemi prodrustwa typa I dželaja, so wotpowědnje jich doholětным přeču možnosť da, swoje kruwy w drustwowej hródži hladać. Z tym wolóži so jim dželo.

To, štož docpěchmy w Radworju a w mnohich druhich prodrustwach Budyskeho wokrjesa, je žiwy dopokaz za prawosć marxistisko-leninistiskeje agrarneje politiky strony dželačerskeje klasy. Smy přeswědčeni, zo so wuspěšnje zahajena kooperacija w pólnym hospodarstwe z prodrustwomaj Wulki Wjelkow a Zarěč klětu zaměrnje hač k zchromadnej rostlinskej produkciji dale wuwija“, wuzběhny Beno Cyž.

Twarska organizacija w Małym Wjelkowie nastaji hromadže z prodrustwownikami plečiznowy plan, w kotrymž su wot wšeho spočatka, wot položena zakładneho kamjenja hač k přepodaću kluča konkretnje wažne termíny a kroki zapisane, kaž na př. wotzamknjenje wotpowědných twarskich dželów, wukublanje młodych hladarjow skotu, hladanje a chowanje picy a jeje silěrowanje kaž tež

za to třebny maksimalny a minimalny čas.

Tak ruče kaž nastachu čěže, móžachu z pomocu tutoho plana wuličić, kotre scěhi ma to za dalše dželne nadawki a na kotrym puču móžemy časowe straty wotstronić. Wězo bě Radworskim a Zarěčanskim prodrustwownikam jasne, zo trjebaš za zmištrowanje problemow aktiwnje sobudželo prodrustwownikow a ratarskich dželačerjow kaž tež skutkownu pomoc statnych a towaršnostnych organow. Někotřežkuli prodrustwo abo kooperacija je na tutym problemje hižo zwrěšćila.

Wšě problemy, kotraž sahachu přez možnosť kooperacije, pomhaše dželowa skupina pod nawodom tow. Ullmanna, předsydy Wokrjesneje rady Budyšin, z pomocu 1. sekretara Wokrjesneho nawodnistwa SED Budyšin a zastupnikow ratarskeje rady zmištrować.

Za tajke nadawki, kotraž hodža so w kooperaciji rozrisać, wobsedža partnerojo skutkowny instrument: Prodrustwownicy dželaja aktiwnje w komisijach za pólné hospodarstwo, za skotarstwo a w dalšich sobu. Dobre mysle nazhonitych praktikaljow so hižo zesutkownichu na dobro cyłeje kooperacije. Nětko rěka, wosebje rostlinsku produkciju dale spěchowac, dokelž je to za efektiwnu produkciju w tutym kombinacie přenje wuměnjenje. Z přepodaćom kluča njeje předewzaće kooperaciskich partnerow wotzamknjene. To woni slubichu.

M. K.

